

TEZĂUR LITURGIC

9 SEPTEMBRIE

ACATISTUL SF. 15 CUVIOȘI DE LA GLINSK



MOSCOVA, 2000



АКАФИСТ

преподобным и богоносным отцам нашим, в обители Глинстей преславно просиявшим

Кондак 1

Возбрании небеснаго Воеводы вои преславнии,
досточуднии и всехвальнии отцы преподобнии,
подвиги и чудесы своими землю нашу
осветившии и к небесному Отечеству путь нам
присно указующии, песньми днесь прославить
вас дерзаем и, яко молитвенником усердным
пение сие приносим: Радуйтесь, преподобнии
отцы наша, обители Глинския похвало и
радование.

Икос 1

Ангели земнии и человецы небеснии,
преподобнии старцы глинстии, небесным
чиновом ревнующе, яко бесплотнии безпорочно
пожили есте и венцы правды восприимше,
похвалы присно воспеваются сие:
Радуйтесь, от земли к небеси возшедшии,
Радуйтесь, образ подражания нам явившии;
Радуйтесь, ангельским житием просиявшии,

Радуйтесь, воздержанием страсти угасившии;
Радуйтесь, подвиги вашими всю землю
осияющими,
Радуйтесь, ученьми своими вся к доброделанию
наставляющими;
Радуйтесь, Слобоския земли всеславное
ограждение,
Радуйтесь, Церкви Русския присное величание;
Радуйтесь, преподобнии отцы наша, обители
Глинския похвало и радование.

Кондак 2

Божии служители всеусерднии и чудотворцы
преславнии явились есте, преподобнии отцы
наша, вами бо научены есмы о гресех своих
покаяние приносить и Бога
воспевати: Аллилуиа.

Икос 2

Возсия слава ваша, отцы наша достоблаженнии,
яко заря всеславная, вся пределы земли нашея
озаряющая и мглу греховную далече от верных
отгоняющая и всех подвигающая вас
прославляти пением сицевым:
Радуйтесь, всемощныя наша помощницы,
Радуйтесь, всеусерднии о нас молитвенницы;
Радуйтесь, от бед молитвами вашими нас
ограждающие,

Радуйтесь, от искушений и соблазнов присно
избавляющие;
Радуйтесь, от козней вселукавых нас мудренне
защищающие,
Радуйтесь, любовью своею чада своя
обнимающие;
Радуйтесь, путь ко Христу всем верным
показывающие,
Радуйтесь, к вам со упованием притекающих не
отвергающие;
Радуйтесь, преподобнии отцы наша, обители
Глинския похвало и радование

Кондак 3

Господу последствующе и крестоношения иго
благое и легкое восприимше, плоть свою распяли
есте со страстьми и похотьми и прославили Бога
в душах и телесех ваших, яже суть Божии, песнь
победную присно воспевающе: Аллилуиа.

Икос 3

Древним отцем ревнующе, плоть духу покорили
есте и, похотей отвергшеся, возшли есте на брак
Агнчий и от всех песньми сицевыми
похваляете:
Радуйтесь, благодатию Божиею освященнии,
Радуйтесь, добродетельми светло украшеннии;
Радуйтесь, Бога в телесех ваших прославивши,

Радуйтесь, человекозавистца подвиги своими
посрамивши,
Радуйтесь, советы вселукавыя молитвами
вашими разоривши;
Радуйтесь, всякое искушение преоборовши,
Радуйтесь, житием вашим светлосияющий,
Радуйтесь, и нас в доброделании укрепляющий.
Радуйтесь, преподобнии отцы наша, обители
Глинския похвало и радование

Кондак 4

Елеем молитв ваших умастите язвы сердец
наших, иже лукавых страстей и искушений
стрелами уранены есть, и предстательством
вашим всех нас научите присно Богу
взывать: Аллилуиа.

Икос 4

Житие ваше безпорочно и память ваша с
похвалами присно величается, дивнии и
преславнии отцы наша, во обители Глинстей
просиявшии и всю землю Слободскую, яко
светоприятельныя светильники осветившии,
сего ради пении сицевыми ублажаетесь:
Радуйтесь, светом невечерним просвещеннии,
Радуйтесь, питием безсмертия напоеннии;
Радуйтесь, одеяния душ ваших убелившии,
Радуйтесь, на брак Агнчий прерадостно

возшедшии;
Радуйтесь, Небеснаго Иерусалима граждане
преславнии,
Радуйтесь, о земном Отечестве вашем
молитвеницы усерднии;
Радуйтесь, светом Небесным нас
просвещающи,
Радуйтесь, огня геенскаго нас избавляющи;
Радуйтесь, преподобнии отцы наша, обители
Глинския похвало и радование

Кондак 5

Змия древляго и човекоубийцы искони волю
вселукавую творити не восхотели есте, но
избрали есте волю Божию, всеблагую и
всесовершенную, ко спасению всех приводящую
и пети научающую песнь победную: Аллилуиа.

Икос 5

Иосифа прекраснейшия чистоты и Иовля
мужемудреннаго терпения наследницы явились
есте, отцы духоноснии, и Илииныя ревности о
Господе Бозе Вседержители, сего ради поем вам:
Радуйтесь, отцев древних ревнителие,
Радуйтесь, подвигом их подражателие;
Радуйтесь, чистоты и целомудрия столпи
непоколебимии,
Радуйтесь, ратоборцы преславнии и

непреоборимии;
Радуйтесь, умерщвлением плоти вашей страсти
умертвившии,
Радуйтесь, горняя паче тленного всеусердно
возлюбившии;
Радуйтесь, кожанная одежды греха
всемудренно отринувшии,
Радуйтесь, правдою Божиею, яко ризою
облечении;
Радуйтесь, преподобнии отцы наша, обители
Глинския похвало и радование.

Кондак 6

Крестоношения подвиг добровольно восприяли
есте и, Подвигоположнику последствующе,
воскресения вечнаго причастницы явились есте,
отцы наша преславнии, и незаходимыя славы
Его наследницы, идеже песнь немолчная
воспевается: Аллилуиа.

Икос 6

Личе богоизбранный отцев духоносных, полче
Божественный, молитесь ко Господу о земном
Отечестве вашем и о любвию вас сие
воспевающих:

Радуйтесь, Церкви Русския крини преславнии,
Радуйтесь, Отечества плоды доброкраснии;
Радуйтесь, благолепие Дома Божия

возлюбившии,
Радуйтесь, суету селений грешничих премудро
отринувшии;
Радуйтесь, бронями правды облеченнии,
Радуйтесь, венцем нетленным увенчанныи;
Радуйтесь, имиже Православие утверждается,
Радуйтесь, имиже всякая лесь отгоняется;
Радуйтесь, преподобнии отцы наша, обители
Глинския похвало и радование.

Кондак 7

Неснаго и Великаго Архиеерея служители
преславнии, преподобнии и богоноснии отцы
наша, подвигом добрым в житии вашем
подвизалися есте и в радость Господа своего
внити сподобилися есте, песнь непрестанно Ему
приносяще: Аллилуиа.

Икос 7

Огнь искушений молитвами вашими угасите и
соблазнов бурю неистовую утешите
предстательством вашим и всяких бед свободите
всех, верою вам взывающих:
Радуйтесь, заступницы наша преславнии,
Радуйтесь, молитвенницы о нас предивнии;
Радуйтесь, чудес Христовых пучино
неизмеримая,
Радуйтесь, милостей Господних реко

неоскудная;
Радуйтесь, благодати кладезю неисчерпный,
Радуйтесь, даров Божиих источницы
неистощимии;
Радуйтесь, телес наших целителие,
Радуйтесь, о душах наших предстателие;
Радуйтесь, преподобнии отцы наша, обители
Глинския похвало и радование.

Кондак 8

Православия поборницы преславнии и Церкви
Христовыя столпи непоколебимии, отцы наша
богоноснии, воздевающе преподобнии руцы
ваша, присно Господа молитесь да сохранит нас от
соблазнов и нестроений, да избавит Церковь
Свою от раздоров и разделений, да купно вси
молитву творим: Аллилуиа.

Икос 8

Ризы своя кровию Агнца Завета вечного убелили
есте и ко Господу невозвратно шествующе,
житием вашим, писаньми и наставленьми нам
образ и правило благочестия явили есте, темже
прославляюще вас, поим:

Радуйтесь, ко спасению всех наставляющии,
Радуйтесь, добродетели нас научающии;
Радуйтесь, из глубин страстей изымающии,
Радуйтесь, из ровенца погибели нас

исхищающих;
Радуйтесь, любовью Христовою мир
просветивши,
Радуйтесь, образ нам спасения о Христе
явивши;
Радуйтесь, подвиги своими демоны
посрамивши;
Радуйтесь, сих немощных дерзости всемудренно
поправши;
Радуйтесь, преподобнии отцы наша, обители
Глинския похвало и радование.

Кондак 9

Святая Троица священнии служители, иноков
похваление и светильницы в мире сущим,
пресвитеров украшение и постников величание,
пречуднии старцы пустыни Глинския, ученьми и
подвиги вашими наставлений, молитву
возсылаем Богу: Аллилуиа.

Икос 9

Твердые и боговещанные Господни
проповедатели, от обители Глинския, яко
светозарное светило преславно возсиявши и
всю землю нашу светом веры и благочестия
осветивши, вам, пречуднии отцы наша, пение
и похвалу дерзаем воспети:
Радуйтесь, иноческими соборами воспеваемии,

Радуйтесь, ангельскими лики прославляемии;
Радуйтесь, небесных благ раздаятелие,
Радуйтесь, вертограда Христова неленностные
делателие;
Радуйтесь, крепкое падающих возведение,
Радуйтесь, право стоящим утверждение;
Радуйтесь, души наша благодатию Божией
просвещающи,
Радуйтесь, сердца наша питием благочестия
напоющи;
Радуйтесь, преподобнии отцы наша, обители
Глинския похвало и радование.

Кондак 10

От уст недостойных пение немощное примите,
отцы богоноснии, и любовь свою, яже о
Христе Господе, уврачуйте всякую болезнь
нашу, да купно с вами и со всеми святыми
песнь приносим Богу: Аллилуиа.

Икос 10

Фиал любве божественныя излейте на грехом
умерщвленныя души наша, отцы всеблаженнии,
да присно величаем подвиги ваша преславныя и
помощь вашу молитвенную:
Радуйтесь, Истину вечную нам
благовествующии,
Радуйтесь, от адския муки нас изымающи;

Радуйтесь, неверия грознии обличителие,
Радуйтесь, Тайн Божиих вернии служителие;
Радуйтесь, всемогущее ересей посрамление,
Радуйтесь, всесветлое прелести попрание;
Радуйтесь, яко вами путь ко Христу обретаем,
Радуйтесь, яко похвалу вам от сердец присно
приносим;
Радуйтесь, преподобнии отцы наша, обители
Глинския похвало и радование.

Кондак 11

Хваление наше и песнь псаломскую, в память
вашу днесъ воспеваемыя, примите милостиво,
отцы преподобнии, и Господа о нас присно
молите, Ему вопиюще: Аллилуиа.

Икос 11

Очистити потщитесь души наша от мерзкаго и
душетленного прилога вражия и страстей
нахождения далече отжените от чад ваших,
вопиющих ныне:

Радуйтесь, душ наших очищение,
Радуйтесь, всего мира просвещение;
Радуйтесь, телесам нашим здравие подающими,
Радуйтесь, душам нашим спасение
исходатайствующии;
Радуйтесь, молитвою своею нас укрепляющими,
Радуйтесь, предстательством вашим от бед нас

избавляющих;
Радуйтесь, огнем благодати сердца верных
воспламеняющих,
Радуйтесь, пламень злобы адския
тайнодейственно угащающих;
Радуйтесь, преподобнии отцы наша, обители
Глинския похвало и радование.

Кондак 12

Царь Небесный прият вы в покой свой яко
рабов благих и верных и венцем нетленным
увенча подвиги и труды ваша, отцы наша
преславнии, темже ныне Небесныя славы
причастники явшеся купно со ангелы и святыми
всеми песнь поете: Аллилуиа.

Икос 12

Чесна пред Господом смерть ваша, отцы наша
преподобнии, и память ваша с похвалами и
ангельстии лики величание вам приносят и
человечестии уста ныне благодарственно
воспевают:

Радуйтесь, обетований Божиих сонаследницы,
Радуйтесь, любви Христовы сопричастницы;
Радуйтесь, вселукавых духов прогонителие,
Радуйтесь, козней диавольских победителие;
Радуйтесь, мглу неверия отгоняющих,
Радуйтесь, лживыя неправды потребляющих;

Радуйтесь, всякия правды исполнении,
Радуйтесь, добродетельми светло
преукрашении;
Радуйтесь, преподобнии отцы наша, обители
Глинския похвало и радование.

Кондак 13

О, преподобнии и богоноснии отцы наша, в
обители Глинстей преславно просиявшии и всю
землю нашу благодатию Божиею освятившии,
пение уст наших ныне примите и от бед всяких
избавите чада ваша, да купно с вами песнь
Господеви воспети сподобимся: Аллилуиа.



ПОЛНЫЙ АКАФИСТНИК КАНОНИЧЕСКИЙ

АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ

І

НОВОЕ
* НЕБО